

**Nunatsinni meeqqat atuarfianni ullumikkut meeqqat nalinginnaasumik atuartinneqarnissap saniatigut immikkut pisariaqartitsisut periarfissaat pillugit Naalakkersuisut nalunaarusioqqullugit peqquneqarnissaanik siunnersuut. Nalunaarusiornermi ersersinniarneqassapput, meeqqat qanoq amerlatigisut ullumikkut immikkut atuartinneqarnissaminnik pisariaqartitsisarnersut. Qanoq ukioqassutsimikkut inissisimarnersut, sumi najugaqartuunersut (kommuni sorlermi), aammalu innarluutigisaat suunersoq. Tamatuma saniatigut nalunaarusiap ersersissavaa taakkunannga qanoq meeqqat amerlatigisut angerlarsimaffiup avataani isumaginninnikkut pissutsit tunngavigalugit inissinneqarsimarnersut, taakkunanngalu ilaqutariinni imaluunniit ulloq unnuarlu angerlarsimaffinni qanoq amerlatigisut inissinneqarsimarnersut. Ilanngullugu nalunaarusiami ersersinniarneqassaaq ukiuni qulini aggersuni taamatut inissinneqartartut, meeqqallu atuarfiini nalinginnaasumik neqeroortigineqartartut avataani atuartinneqartariaqartussat, qanoq amerlatiginissaat eqqoriarneqarsinnaanersut.**  
(Inatsisartunut ilaasortaq Debora Kleist, Inuit Ataqtigiit)

#### **Akissuteqaat**

(Ilinniartitaanermut, Ilisimatusarnermut Nunanullu Avannarlernut Suleqateqarnermut Naalakkersuisoq)

#### **Aappassaaneerinninneq**

Inatsisartut Kultureqarnermut, Ilinniartitaanermut, Ilisimatusarnermut Ilageeqarnermullu ataatsimiititaliaat siunnersuummik sukumiisumik suliarinnissimanageranut Naalakkersuisut qutsavigaat.

Naalakkersuisut paasivaat Inatsisartut Kultureqarnermut, Ilinniartitaanermut, Ilisimatusarnermut Ilageeqarnermullu ataatsimiititaliaanni amerlanerussuteqartut tassaasut Inuit Ataqtigiit aamma Demokraatit siunnersuut akuersissutigineqassasoq inassutigisimagaat. Naalakkersuisut aamma paasivaat Siumup ilaasortaatitaasa ikinnerussuteqarlutik siunnersuut itigartitsissutigineqassasoq inassutigigaat, tamannali siunnersuutip pingaaruteqassusaanut akerliunermik peqquteqarani suliap aallartisareerneqarsimanageranik paasinninnerusoq, Naalakkersuisullu suliamik aallartinneqareersumik suliaakkerniarneqanngitsut.

Siunnersuummik siullermeerinninnermi Naalakkersuisut akissuteqaatiminni ilisimatitsissutigaaq misissoqqisaagassatut siunnersuutigineqartut ilaat ullumikkut qulaajarneqarsinnaanerat periarfissaareersoq paasissutissalli kommunit Namminersorlutillu Oqartussat suliffeqarfiini siammaqqasut aaqqissuulluarnissaat pitsaassusiisalu qularnaarnissaat annertuumik pisariaqartinneqartoq. Naalakkersuisut nangillutik ilisimatitsissutigaaq siunnersuut Meeqqanut Inuusuttunullu Periusissiap suliareqqinnissaani piviusunngortinniarneqarumaartoq.

Naalakkersuisut naggataatigut inassuteqaatiminni oqaatigaat pissutsit siunnersuummi pineqartut Meeqqanut Inuusuttunullu Periusissiami ilaareeraluartut,

Naalakkersuisut Inatsisartunit immersorneqaqqinnissartik qilanaarigaat taamaammallu siunnersuutip akuerineqarnissaa inassutigigaat.

Ataatsimiititaliap isumaliutissiissutimini sulinissap imarisinnaasaanut innersuussuteqarput tamannalu Naalakkersuisut qujassutigaaat innersuussutillu sulinissami ilanngunneqarnissaa qulakkiissallugu.

Naalakkersuisut taamatut naatsumik oqaaseqarlutik siunnersuutip akuerineqarnissaanik inassuteqaatertik attatiinnarpaat.